

QUÆSTIO MEDICA,

*Quodlibetariis disputationibus manè discutienda in Scholis
Medicorum, die Jovis decimâ secundâ Februarii 1711.*

M. CAMILLO FALCONET, Medico Regis
ordinario & amplissimi Galliarum Cancellarii,
Doctore & Præside.

An Fœtui sanguis maternus alimento?

I.

GENERARI dicitur Animans, ex quo nutrirî incipit: ut in nutritione posita sint haud minùs Animantis initia, quàm incrementum atque perfectio. Verùm alia nutritionis ratio in primordiis, alia in ætate subsequenti. Majorem alimenti partem in Fœtûs venas ex Matre transfundi, omnibus fere obvium est; at non ita multis animadversum, quid, præter insolitas quibus com meat vias, Fœtûs alimentum ab Adulti alimento discereper. Discriminis illius tria sunt capita, qualitas quantitas & motus. Nutriendi corporis qualitas consimilem desiderat qualitatem in succo nutrituro: quàm mollia ac tenera sunt Embryonis Fœtûs-ve alendi stamina, tam mites delicatas ductilesque decet esse alibiles particulas. Maximâ verò copiâ alibilem succum affluere oportet, qui ex tantulo puncto Fœtum in eam molem augeat, ut ratio, quâ humanus V. G. Fœtus per novem menses crescit in utero, decies millies & ampliùs superet rationem, quâ per reliquum vitæ cursum ad justam magnitudinem pervenit. Motu tandem, nisi quàm lenissimo, non fas est in compagis adeo teneræ recessus, succum nutricium irrepere.

II.

HARUM conditionum nulla deest lacteo succo, quo tnrget uterus à conceptu. Non citiùs aurâ seminali fœmineus sanguis afflatur, quàm uterî contextus mirum in modum immutari occipiat. Tum genitale aruum emolliri, fibræ laxari, meatus invii tunc primùm recludi, quibus serum lactescens à sanguine secernatur ac in cellulas uterinas confluat. Is est nimirum liquor, quem stillantem ex uterî fundo membranæ Fœtûs cæcis quasi poris initio combibunt; placenta deinde radiculis in cellulas actis manifestè trahit; ut pars ejus per venam

umbilicalem sanguini committatur, pars altera in Ampii cavitatem suppoſtetur, unde ſugat Fœtus ubi ſugendo erit. Talem liquorem genuinum eſſe Fœtus alimētum negaverit is ſolus, qui rationi ſimul & ſenſibus nuntium tenuerit. In plerisque Animalibus uterus mammae inſtar ſucco illo turgidus deprehenditur: in Ruminantibus præſertim tam ex uteri cotyledonibus quàm ex chorii carunculis plenis manibus emulgetur. Præterea quid in illo deſiderari poteſt, ut alimenti munia perfectè impleat: ſos eſt delibatus ſanguinei crēmoris, tantò purgator ipſo mammarum lacte quantò Fœtus tenerior eſt puero lactente. Suppetit deinde quantum ſatis ſit, majori in dies copiâ pro Fœtus incremento in uterum confluens; ipſe aliàs totus quantus eſt alibilis. Denique ut humores lymphatici, quod genus eſt ſuccus ille nutritius, moderato curſu feruntur, ita ille ſenſim ſine ſenſu, ut par eſt, in Fœtus venas illabitur.

I I I.

IN ſanguine materno quæras fruſtra, quæcumque in lacte uterino obvia ſe ſe dant: nam ut eodem ordine aggrediamur, viæ nullæ apparent, quibus ſanguis ille in Fœtum ab utero commeet. Nimirum ex parte Fœtus, ne minima quidem hiant vaſa in placenta ſuperficie, modò illaſam tractes, quibus, vel ſi validdè comprimas, ſanguinis guttam poſſis elicere: ex parte verò uteri, vaſa quibus menſtrua erumpunt numquàm magis impervia ſunt, quàm graviditatis tempore; quippe quæ Fœtus utero affixus mole ſua ad uteri fundum replicata admoveat ſicque occludat: hoc obice remoto per hæc eadem vaſa fluunt lochia, cùm ſanguini congeſto hæc ſit facilior via, quàm per venas ſubſidentis poſt partum uteri molis. Commentitia itaque eſt arteriarum & venarum Matris conglutinatio cùm venis & arteriis Fœtus: conceſſo etiam illam fieri poſſe; nulla certè eſt, dum conceptus omni nexu ſolutus utero comprehenditur; quod primis graviditatis temporibus ſit in omnibus Animalibus, in quibusdam ad extrema uſque: tunc ſanè in uteri cavum priùs effundi ſanguinem neceſſe foret, quàm vaſorum placentaſtia ſubiret; quod quidem fateri reformident, vel ipſi hujus ſententiaſ patroni. Jam verò quàm à ratione alienum eſt, ſanguinem ſulfure & ſale ferventem, qualis eſt maternus, in Embryonis corpuſculum infundi: proſectò alibiles partes talis liquoris alveo convecta, non tam alendo corpori profutura, quàm tot heterogeneæ præpollentes nocituraſ eſſent: præpoſtere etiam Natura videretur egiſſe, quæ Animalis adulti ſanguinem in Animalculum, dum imbecillius eſt, ejus nutriendi cauſâ induceret, quod robuſtius deinde factum deficiat; tam inſigniter augendo Fœtui par eſſet, cùm vix ille centeſimâ ſui parte alibilis cenſendus ſit; recrementis verò iis abundet, quæ per incernicula Fœtus majori copia ſecedere deberent, quàm re ipſâ ſecedunt: quandoquidem, quicquid purgamenti ſuper eſt de humore, quo per novem menſes alitur Fœtus, humanus v. g. id omne veſicâ & inteſtinis facilè contineri videmus: Poſtremo ſi quid valet decantata illa fluida inter & ſolida æquilibras, annon ſanguinis motus ex uteri arteriis in Fœtus venas corde materno impulſi violentior eſt, quàm ut tenellæ fibræ obſiſtere valeant? An etiam corculum Fœtus imperu

3
sanguinis à corde materno vibrati jugiter quassatum sui juris motum retinere
potest, quin rhythmum validioris cordis sequi cogeretur.

IV.

RATIONIBUS validissimis, si quid iudicii nostri est, sententia de san-
guine materno oppugnata fuit; illas tamen experimento anatomico cumu-
labimus, eoque inter alia bene multa ut facillimo ita liquidissimo; ne qua veri-
tatis lucem refugientibus latebra supersit. Canis gravida in prædictu partus
vasis sanguiferis sectis sanguine exhauritur, ut vix semuncia, idque in corde vel
proximè cor sit reliqua; tum aperitur uterus, qui exsanguis omnino est, pla-
centæ catulorum eximuntur, quod levi tactu facias, & apertis membranis catuli
reperiuntur sanguine pleni imò vivi, etiam si dimidiam horam à Matris morte
membranas aperias. Valeant igitur quæcunque temere observata huic experi-
mento repugnaverint: si quis Fœtus exsanguis occurrerit in muliere quæ ex alto
lapsa sanguinem omnem profuderit; vel exsanguem putandum est Fœtum
vicio conformationis jam antea fuisse, vel vase aliquo placentæ rupto sanguinem
profluxisse, cujus vestigia observatorem sefellerint, parum, ut fere fit, ad ea
attentum quæ præjudicatæ opinioni adversantur. Quicquid id est, observatio
temere instituta, quam casus obtulit, nec iterum forsân offerret, non habet
ictum quo minimum labefaceret experimenti auctoritatem, quod pluries repe-
tutum eadem ratione semper succedit; quodque, si incredulis lubet, sexcenties
iterum repeti potest. Mitto autem cætera quibus fidem allatæ observationi mu-
nire conantur; & uterum & placentam, quæ se spectant, membranas carere;
ideoque vasorum utrimque hiantium facilem conglutinationem esse: nullas esse
glandulas in utero quibus humor lacteus secernatur; aliaque id genus quæ veritati
tam repugnant quàm tenebræ luci. Cæterùm lochia in argumentum suæ opinionis
trahere: placentam nescire cui u sui foret, nisi sanguini à matre excipiendo inter-
viret, atque similia id tantum evincunt, Viros esse præclarè aliàs de re anatomicâ
meritos, quibus volupe sit ignorare quod alii gaudent cognovisse.

V.

FOETUS, totum in toto, Animal in Animal, partibus Matris annumeran-
dus minimè est: mortuæ Matri sæpe enim superstes, communi vitâ nequa-
quam ei conjungi fidem facit. Sua cuique est vita, quippe suis cuique sanguis ab
ingenitâ cruoris guttâ, unde & in Molis sanguinis origo. Verùm si sanguine
eodem uterque animaretur, jam vitæ communitate in unum coalescerent duo,
ut simul interitura, ita nullo tempore a se invicem forte divellenda: quò enim
vasorum sanguiferorum conglutinatiō magis inveterasceret, eò ægrius divelleretur:
sic numquam graviditati partus succederet; quippe qui non solum à
præsentī conglutinatione semper impediretur; sed etiam unde cieretur, causam
non haberet: nam in eo ipso prima partus ratio posita est, quòd maternus
sanguis Fœtu exclusus vasa uteri sub finem graviditatis ita distendit; ut inde vas-
cula, quibus succus lacteus commeat à Matre ad Fœtum comprimantur;

4
 sicque Fœtui alimentum subtrahatur, placenta radiculæ contabescant &c. Quid
 plura? dicendorum numquam foret finis; cùm veritatis argumenta ut depromuntur,
 majori semper copiâ subeant: analogiam tamen ex Oviparis petitam omittere non
 licet: hac solâ si non vincitur, res saltem aliunde demonstrata mirè illustratur.
 Siquidem cùm nihil Ovipara inter & Vivipara videamus interesse, nisi quatenus
 in his alimentum Fœtui per partes in momenta subministratur; in illis verò
 totum simul & semel in ovo congeritur; quàm verisimile est, alimentum illud,
 ut in Oviparis nemine refragante, ita in Viviparis alienum a sanguine prorsus
 esse. Sic tandem ductis a ratione ab experimentis & ab analogiâ argumentis jure
 concluditur.

Non ergo Fœtui sanguis maternus alimento.

Domini Doctores disputaturi.

*M. Thomas Bernardus
 Bertrand.*

*M. Hyacinthus Theodorus
 Baron.*

*M. Alexis Littere Acadē-
 mia Regiæ scientiarum so-
 cius.*

M. Aegidius Adam.

*M. Joannes Nicolaus De-
 lahire ex Academiâ Re-
 giâ scientiarum.*

*M. Petrus Joannes Burette
 Professor Regius, è Regiâ
 nominatus Academiâ.*

*M. Camillus Falconet,
 Preses.*

M. Philippus Caron.

M. Ludovicus de Vaux.

Proponerebat Parisiis ANTONIUS DE JUSSIEU Lugdu-
 nensis, in horto Regio Parisiensi Botanices Professor Regius
 & Baccalaureus Medicus. A. R. S. H. 1711.

Apud viduam Francisci Muguet Typographi Regis. 1711.